

■ ORD LA VITA DA LUDMILLA CAHENZLI

Vegns cun mai tar la dentista?

«Mamma, jau stos ir tar il dentist. Vegns era cun mai?»

«Vai anc!» di mia mamma da l'autra vart da la lingia da telefon: «Ti has quaranta onns. Ti es veglia avunda dad ir persula tar il dentist.»

Dad x-insanua enconusch'jau questa construcziun. N'avev'jau betg ditg ca. il medem avant dus mais cura che mia figlia aveva stuì ir tar la dentista e m'aveva dumandà, sch'jau l'accumpogn.

Diavelen. Jau sun ina uschè brutala mamma che fatsch ir mia paupra figlia tut persula tar la dentista. Ed uss fa mia mamma exact il medem cun mai. Ma jau na dun anc betg si il spiert.

«Mamma! Fai il bain e vea. Jau stos laschar far in tractament da la ragischa. L'ultima giada ha quai fatg dolurs.» Jau sgnuffel.

«Sche bun», di mia mamma. «Jau t'accumpogn. Cura has dad ir?»

«En in'ura.»

«Ma jau dovr minimum duas uras fin ch'jau sun tar tai», di mia mamma.

«Gea, quai è vaira. Sche lura spost jau il termin», di jau.

«Ludmilla! Uss na fai betg teaters e va tar il dentist. En duas uras èsi vargà tut.»

«Ma i fa mal ed jau hai tema.»

«Taidla Ludmilla, jau envid ina chandaila per tai e ditg intgins paternoss, lura va quai schon.»

«Mhm», di jau.

«Has chapì? Jau pens vi da tai!»

«Mhm», di jau.

«Na stos betg temair, ti stos ta fidar sin Dieu.»

Suenter blers “mhm's” ed in fermezza coaching religius terminain nus noss discurs al telefon.

Jau accept mia sort. Ed il pli impurtant: Jau engir da mai pli trametter in da mes uffants tut sulet tar il dentist. Na,

en ina tala ura na dastga ina mamma betg abandunar in uffant.

P.S. I n'è per cas betg stà uschè nausch. Mia mamma ha schon raschun ch'ins na duess betg tadlar sin tuts puplims e planschims e pupragnar memia fitg ils uffants. Quels san bain ir sez tar il dentist.

Da Ludmilla Cahenzli